

四庫全書

子部

欽定四庫全書

唐開元占經卷二十四

唐 瞿曇悉達 撰

歲星占二

歲星犯東方七宿

歲星犯角一

石氏曰歲星犯左角天下之道皆不通犯右角天下王使絕滅 荊州占曰歲星犯角天下有兵將相有憂犯

右角右將憂 石氏曰歲星入角天下有兵其行疾六十日行遲百二十日遠百八十日 黃帝占曰歲星出道天下太平出陽道旱出陰道多雨 陳卓曰歲星出陰道多陰謀 甘氏曰歲星逆行入角人主出入不時若有急事千里之行一曰女子多死 孝經右秘曰歲星在角天下大病 石氏曰歲星乘左角法官誅乘右角大將軍死 郝萌曰歲星乘左角為旱乘右角為水為兵 荊州占曰歲星乘右角為后族家若將相有生

法死者 郝萌曰歲星居角歲大熟 又占曰歲星守
角為中兵留兩角間關梁不通軍有興國建邊城境不
通 石氏曰歲星出入留舍角角為天田歲星來入守
之其國五穀大熟絲綿為平民大樂守之百日不下國
有兵 又占曰歲星守角中五穀成熟歲平安樂守之
百日兵起 又占曰歲星守右角十六日君命衆子
又占曰歲星守左角七日朝去國有憂去一尺七寸天
下同心 甘氏曰歲星守角王者大赦忠臣用 海中

占曰歲星守左右角其色黃白小旱民小厲其逆行即
旱其還立雨糴如故 又占曰歲星犯左右角逆行為
旱五穀不收 又占曰歲星守角一南一北宜黍與稷
郝萌曰歲星守左右角赦一曰守十餘日有赦不盡
又占曰歲星守角處其北五穀不收 又占曰歲星
守角政事急有千里之行 又占曰歲星守角為兵傷
大臣 荊州占曰歲星守右角有大德令期八十日
又占曰歲星守右角處其北五穀半收守左角處其南

及守天田有大水五穀不成大饑人相食 石氏曰歲星犯乘守左角七以上天下大赦守右角賢士用期七十日 郝萌曰歲星逆乘陵左右角其為日蝕國有憂 又占曰歲星犯天庭臣為亂 又占曰歲星守犯陵右角為禍咎 又占曰歲星舍若食角女子多死

歲星犯亢二

石氏曰歲星犯亢天子之座則敗於君 又曰歲星數入亢其國疾疫 巫咸曰歲星入亢歲有旱絲綿貴

若守之三十日以上有兵起其年饑人相食 郝萌曰

歲星入亢行疾國君受弔有大飛蟲驚動人心期在百

五十日其行遲至難期二百五十日中 又占曰歲星逆

行亢其君不親政事朝廷多非其人 石氏曰歲星經

亢朝鄭國有兵 春秋圖曰歲星之亢其年大熟絲絮

大貴 郝萌曰歲星入亢或東或西去亢一尺若三尺

地大動期戊己食時 陳卓曰歲星乘亢右星穀物有

不成者為大兵 郝萌曰歲星逆乘滅亢右星為大人

憂逆乘滅左星天下有奇令 又占曰歲星舍亢為歲
小有水 黃帝占曰歲星舍亢南地動 郝萌曰歲星
出入留舍亢六十日不下十月有兵進來守之兵不用
國有名者死退而守之有客外來者期十月 又占曰
歲星有留廷中為天下憂 石氏曰歲星守亢年大熟
天下有大令國有忠臣若守之去一尺七寸星隕 又
占曰歲星守亢下田豐魚十倍 又占曰歲星守亢處
其南其歲地動處其東狗生妖處其北米太貴人多徙

處其西馬生妖守東羊生妖若狗生妖也 又占曰歲星

守亢有小兵 海中占曰歲星守亢為地動 又占曰

歲星守亢北貴人多移徙貴人為妖祥多疾一曰大人

流亡 又占曰歲星守亢王者有德令禾稼熟 又曰

封侯有小疾國君受弔飛蟲六畜生非其類為妖有小

賊民多流亡期百五十日若一年 又曰居亢歲旱

郝萌曰歲星守亢天子大令國用忠臣其守七日以上

至四十日國徵大賢王者更政號期百五十日一曰大

赦使行九州 陳卓曰歲星犯天府邊臣為亂 郝萌

曰歲星守亢左星為雉旱不生一曰多蟲蝗守右星五
穀以水傷敗一曰有大兵百二十日 又曰歲星守亢
十日而去國大豐穰庫倉餘 黃帝占曰歲星逆行守
亢為中兵 甘氏曰歲星犯守亢逆行失其明色王不
用事

歲星犯氐三

石氏曰歲星犯氐國無儲 荊州占曰歲星犯氐左星

左中郎將誅死犯右星右中郎將誅死皆期三年 郝

萌曰歲星入氐不出其年有赦 又占曰歲星逆行氐

其君治宮室過制度 黃帝占曰歲星之氐其歲熟賤

人有病 郝萌曰歲星乘氐之右星天下有大水大兵

乘氐之左星天子有自將兵於野 海中占曰歲星居

氐五穀以旱傷 郝萌曰歲星處氐西歲多饑傷北有

小賊貴人多徙牛多死其肉殺人南馬多死民多寒熱

疾 石氏曰歲星出入留舍氐者天庫之星也其國有

急令其歲則太平還而守之其國以兵致天下 又占

曰歲星守氐孽妾有憊者若與月合在氐而暈不出四

十日有德令 又占曰歲星守氐王者立后期八十日

甘氏曰歲星守氐君有喜若拜后不出九十日又曰

皇后喜 巫咸曰歲星守氐國大饑人民流亡 又占

曰歲星守氐為民多疾病 郝萌曰歲星守氐南其年

地動 又占曰歲星守氐逆行其君不居其宮 荊州

占曰歲星守氐諸侯人君有來入宮者其行疾期六十

日其行遲百二十日

宋宗書天文志曰宋後廢帝元徽三年十月丙戌歲星入氐五年七

月廢帝隕安成王入墓皇既後三年齊受禪

又占曰歲星守氐為后夫人憂

謂東行反還去兩星二尺期一百二十日去兩星一尺期六十日與兩星齊期二十日以赦解之 陳卓曰歲星守氐五穀蟲蝗萬物不成 海中占曰歲星守犯氐成鈞已環繞之其國饑人君失時政令不行

歲星犯房四

石氏曰歲星犯房太子之身居其所避之九十日 郝

萌曰歲星入房三道為天子有子 又占曰歲星入房
十日成鈞已者為天子惡之以赦解之又曰為后夫人
喪過房東行復還反也 又占曰歲星入房更令期百
二十日 荊州占曰歲星入房五穀豐治太平民無疾
殃有德令期四月 郝萌曰歲星居房南歲多旱五穀
以旱傷居房北多水五穀以水傷又曰在房北為大水
其國舟楫相望 又占曰歲星處房南民多寒熱病處
房北牛多死其肉殺人東馬多死西饑傷 黃帝占曰

歲星舍房玄色不明有喪又曰大水 郁萌曰歲星與

房合兵戰滿野又曰有白衣之會 荊州占曰歲星中

犯陵房國君憂色青憂喪色赤憂兵積尸成山色黑有

將相誅色白有芒角大哭 黃帝占曰歲星守房七日

不出有崩王十五日不出兵大起 石氏曰歲星守房

有白衣會發男也 又占曰歲星守房其國多禍殃吏

民相傷大臣將滿道而行 又占曰歲星守房為大人

憂以赦解之 又占曰歲星守房在南牛馬無羈縻

又占曰歲星守房五穀豐熟 甘氏曰歲星守房天下

和平 海中占曰歲星守房他國有獻馬者魚鹽十倍

郝萌曰歲星守房天倉倉虛空 又占曰歲星守房

為人主無下堂 又占曰歲星守房為天下諸侯相謀

慮道不通 又占曰歲星守房為邊兵發 又占曰歲

星守房為大饑人相食死者不葬 又占曰歲星守房

大赦 案宋書天文志曰魏景元四年十月歲星守房占曰將相有憂明年正月大尉鄧艾司徒鍾會並誅滅

特赦益土咸熙二年秋又大赦

荊州占曰歲星守房王者心平百姓

得情 荊州占曰歲星守房有反臣大人喪天下易王

黃帝占曰歲星行房南若犯守之為大旱行房北犯

守之為大水 東官候曰歲星犯守房去復還色不明

成鈞己國有喪白衣之會 郝萌曰歲星中犯乘守房

右驂若右服其大人死所中將相誅

案司馬彪天文志曰孝明永平十六

年正月丁丑歲星犯房右驂北第一星不見辛巳乃見房右驂為貴臣歲星犯之見誅是後司徒郎穆與阜陵

王延交通逆謀自殺

郝萌曰歲星逆留犯守乘陵房左右驂主

崩臣有陰謀逆行乘陵中道天子失位而亡順行乘陵

中道天下平和 又占曰歲星不入房中正道其君不
居明堂一曰不敬明堂 韓陽曰歲星犯房鉤鈴王者
憂 郝萌曰歲星犯乘鉤鈴大臣有誤天子不尊事天
者致火災於宗廟中王者不宜出宮下殿有謀匿於宗廟
中者 海中占曰歲星守鉤鈴天下饑三年 荊州占
曰歲星守鉤鈴去之三寸王者失政宮門不開近臣起
亂

歲星犯心五

石氏曰歲星近心七寸以內有暴貴者不出百八十日

仰觀占曰歲星犯心所當之國戰不勝一曰將軍聞

死海中占曰歲星犯心天子星王者絕嗣犯太子太

子不利犯庶子庶子不利石氏曰歲星經心清明

烈照天下內奉明王帝必延年黃帝占曰歲星至心

正不失道天下和平軌道失綱災變生東官侯曰歲

犯犯庶子星庶子有憂不出百八十日郝萌曰歲星

不入明堂正道其君不敬明堂一曰不居明堂郝萌

曰歲星入心天下諸侯有慶賞之事期九十日 荊州

占曰歲星入角守氐之心滿二十日以上期不出一年

之中且有立王其所行者無不利也行疾則治肅行遲

則失職 石氏曰歲星乘心北其國旱室廟有焚者南

出行疾有兵起 石氏曰歲星乘心其國相死 海中

占曰歲星居心多旱五穀以旱傷 又占曰歲星合心

玄色不明有喪 齊伯五星占曰歲星出入留舍心之

上春夏糴貴秋冬平價二十日不下冬兵大起負海大

敗六十日不下天下有急令 春秋緯曰歲星守心天子有慶賜 援神契曰歲星守心年穀豐 石氏曰歲星守心王者得天心陰陽和天下大豐五穀成熟有慶賜賢士用皆有令德 巫咸曰歲星守心有火異 又占曰歲星守心萬物五穀不成吳楚其齊倍 郝萌曰歲星守天司空貴人多病死 又占曰歲星守天司空土功起 又占曰歲星守心東馬多死其肉殺人守心西萬物不成多饑傷守心南多寒熱病守心北牛多死

其肉殺人

荊州占曰歲星守心七日以上至七十二

日名曰母覆其子陰陽和平王者得天心忠士皆用四

夷服天下安

黃帝占曰歲星逆行守心環繞成鈞已

為大人忌之期六月故赦以解之 甘氏曰歲星犯守

心內禮臣欲謀主若早有土功春夏糴貴秋冬糴賤若

守之六十日不下有急令 石氏曰歲星犯乘守心大

凶 郝萌曰歲星犯乘守心明堂為大人憂近期十月

遠期三年 又占曰歲星犯乘守心明堂為內亂臣欲

殺主有亡國近期一年二年三年遠期二十八年 又
占曰歲星犯乘守太子星者太子憂不死則去 又占
曰歲星犯乘守太子星女主勢行 石氏曰歲星中犯
乘太子位太子憂犯少子位少子憂 又占曰歲星中
犯乘守心明堂在陽為燕在陰為外 巫咸曰歲星中
犯乘守心明堂為大戰不勝將軍鬪死 郝萌曰歲星
中犯乘守心明堂為萬民備火近期一年中期三年遠
期九年一曰天下旱 又占曰歲星犯乘心明堂大臣

當之 海中占曰歲星留逆犯守乘陵心者王宮內賊
亂臣下有謀易主者天子權在宗家得勢大臣

歲星犯尾六

石氏曰歲星入尾天下諸侯有慶賀之事期九十日

巫咸曰歲星入尾王者賜后宮立太子若后族有陞顯
者不出百八十日 東官候曰歲星入尾妾為嫡臣專

政賣權災為起 郝萌曰歲星逆行而宿尾天子淫佚

又占曰歲星處尾旁旱水 又占曰歲星舍尾處其

東冬龍馬多死處其北牛多死肉殺人處其西傷穀處其南民多寒熱政急海中占曰歲星出入留舍尾五十日不下天下一國有大臣亡者齊伯五星占曰歲星出入留舍尾尾者燕之星也其國則以義致天下三十日不下大亂河圖曰歲星守尾三十日有逆殺上者兵起車馳甘氏曰歲星守尾人民為變大臣作亂有反逆從大將家起若中有讒諛臣期二十日若卿當之又占曰歲星守尾穀大貴人民歸食又占曰歲

星守尾三十日王者立貴后夫人若生太子欲封寵后族 邠萌曰歲星守尾為用事者當之天下牢開大赦 巫咸曰歲星守尾旱 邠萌曰歲星守尾成鈎己夫 人女君死亡 玄冥占曰歲星守尾王者賜后宮立太子 甘氏曰歲星入尾而守之人主以嬪為后政在臣 下期四十日 邠萌曰歲星犯守尾為女主夫人妃后 惡之 又占曰歲星留逆犯守乘陵尾皇后有珠玉簪 珥惑天子者誣讒大起后相貴臣誅宮人出走兵起宮

門

歲星犯箕七

春秋緯曰歲星犯箕中天下大亂兵大起 郝萌曰歲星犯箕女主宮人有憂 郝萌曰歲星犯箕為天下大赦 石氏曰歲星入箕天下大亂其中有一星民莫處其室養者星在箕南旱在北有水箕踵者歲熟 巫咸曰歲星入箕中伺其出日而數之皆如期二十日兵發伺始入處數之率一日期十日軍罷 郝萌曰歲星入

箕糴價三倍 又占曰歲星入箕中行病宮中有口舌
相讒事期五十日若百二十日 荊州占曰歲星入箕
盜大起多鬪死者歲不熟 石氏曰歲星出箕穀大貴
天下大旱饑死過半 郝萌曰歲星逆行入箕中其君
淫佚 春秋圖曰歲星之箕年多風 郝萌曰歲星出
入留舍箕箕者燕之星也歲星守之其國以武致天下
六十日不下其燕且有為致天下也 又曰歲星居箕
多旱 春秋緯曰歲星守天司空歲水 甘氏曰歲星

守箕多惡風有旱災其國大饑人相食 郝萌曰歲星

守箕東歲熟南小穰熟北大穰西饑 郝萌曰歲星守

箕貴人多死病 又占曰歲星守箕為其歲水 又占

曰歲星守箕則多土功 又占曰歲星守司空大臣衛

守 東官候曰歲星留守箕七日以上去之七尺以內

貴女有尊進者

唐開元占經卷二十四

欽定四庫全書

唐開元占經卷二十五

唐 瞿曇悉達 撰

歲星占三

歲星犯北方七宿

歲星犯南斗一

石氏曰歲星犯南斗為赦 北官候曰歲星逆行犯南

斗其君賞賜非其人 海中占曰歲星入南斗中死者

甚衆 郝萌曰歲星入南斗天下受爵祿近期六十日
遠期百二十日 荊州占曰歲星入南斗中水不可當
陳卓曰歲星入南斗魁中有殃一曰歲旱一曰斗為
宰相歲星入斗留二十日以上卿相有憂太后惡之

又曰逆行入斗中必有亡國死王 北官侯曰歲入南
斗必有受祿增爵者 石氏曰歲星經南斗吳國稻粱
大熟 春秋緯曰歲星入南斗五穀絲麻價平 海中
占曰歲星居南斗五穀以旱傷 郝萌曰歲星居南斗

河戍間道不通 又曰歲星處南斗北不利兒子處斗
西歲多饑傷民多死處斗南多病寒熱 又曰歲星處
南斗北歲早水晚旱 北官候曰歲星處南斗西虎狼
入國一曰民多死處南斗南多亡狗 郝萌曰歲星處
南斗旗不用衆有天下 荊州占曰歲星入南斗二十
日以上至二百四十日主者用德忠臣升位 郝萌曰
歲星舍南斗處其北牛多死其肉殺人處其東馬多死
又曰歲星出入留舍南斗六十日不下天下大流亡

退而守之其國有兵客大破 考異郵曰歲星守南斗
君臣乖倍 石氏曰歲星守南斗魁失道者死 又曰
歲星守南斗天下大饑人相食 荊州占曰歲星守南
斗君臣俱明天下更年五禮更興 感精符曰歲星逆
行入南斗守魁中大臣國相逆天下叛離不同心君臣
不和順行而守南斗既去而復還居之不久易其色常
光明天下同心君臣和義 北官候曰歲星逆行守南
斗其國且有兵一曰有軍來者一曰客軍大敗 郝萌

曰歲星舍木退而守南斗其國且有兵客軍大敗

牽牛為木

星也

巫咸曰歲星入南斗者留守斗所守之國當誅

春秋圖曰歲星犯南斗而守之大臣逆謀其國有兵年
大饑人相食歲大惡 郝萌曰歲星犯南斗百日兵用
大臣死 陳卓曰歲星犯守南斗有赦

歲星犯牽牛二

郝萌曰歲星入牽牛為天下牛車有行 又曰歲星入
牽牛諸侯有失期者 荊州占曰歲星入牽牛歲多水

虎狼害人民人凍死臣謀其主民饑貴人多死小兒多死石氏曰歲星行牽牛越貢獻金銀 郝萌曰歲星逆行牽牛其君不愛親戚 春秋圖曰歲星之牽牛筋皮革大貴 玉歷曰歲星之牽牛歲水民饑有自賣者 郝萌曰歲星乘牽牛為人相棄於道 又占曰歲星居牽牛多旱一曰居牽牛南三尺旱 海中占曰歲星舍牽牛殺虎狼入國一曰守牛西虎狼多入邑中者 郝萌曰歲星出入

留舍牽牛三十日不下天下大臣且有死者致於鈇鉞
之中九十日不下大將出客兵來期不出三年 孝經
章句曰歲星守天關在其北民流死在西民以風災死
若虎狼入國在其南狗多狂亡在其東不利嬰兒 石
氏曰歲星守牽牛三十日至九十日天下和平道德明
四夷朝中國 又曰歲星守牽牛農人死於野陰陽不
和 巫咸曰歲星守牽牛馬五穀多傷 海中占曰歲
星守牽牛臣謀君糴貴三月乃復 郝萌曰歲星守牽

牛為穀貴 又曰歲星守牽牛東春牛大癘一曰居南
夏牛大癘 陳卓曰歲星守牽牛南五穀以水傷守牛
東萬物不成饑民流亡六畜若牛多死病大臣有謀事
守牛北民寒凍死守牛西地氣發泄歲多水 文曜鉤

曰歲星犯守牽牛大臣謀其主大人有戮死者火犯眾
火宮火大起道路不通 甘氏曰歲星犯牽牛留守之
為破軍殺將 陳卓曰歲星犯牽牛貴人多喪諸侯失

明

歲星犯須女三

甘氏曰歲星入須女有進美女者大人有慶若有女喜
立后拜太子期三十日若九十日宮人有受賜者北
官候曰歲星入須女諸侯有賀天子以美女期三十日
若九十日 石氏曰歲星經須女越貢獻金銀 郝萌

曰歲星居須女宮中有水災一曰五穀有水傷 玄冥
占曰歲星居須女歲多水 荊州占曰歲星留須女二
十日布帛大貴期四十日 巫咸曰歲星宿須女而逆

行其君不務農桑令 黃帝占曰歲星出入留舍須女而守犯至三十日不下小人有慶五十日不下更立侯王六十日不下兵起於野冬入在春也 郝萌曰歲星出入留舍須女不出二年天下用兵 黃帝占曰歲星守須女糴石三百民有自賣者 春秋圖曰歲星守須女絲麻大貴 石氏曰歲星守須女國邑饑一曰有喪一曰大水且主有女喪 郝萌曰歲星舍須女東不利兒子舍其南多亡狗狗多嗥舍其西虎狼入邑民多風

雷死舍其北多寒凍死一曰多鼠 巫咸曰歲星守須

女三日以上至二十日去之一尺

荊州占曰去之三

尺以外王

者欲發財寶若發女工伎不出七十日 巫

咸曰歲星守須女為萬物不成 又曰歲星守須女寡

婦多死一曰大人有慶 海中占曰歲星守須女有嫁

娶布帛之事 郝萌曰歲星守須女為后夫人有變一

曰妾為主 又曰歲星守須女穀不熟 玄冥占曰歲

星守須女國大饑 陳卓曰歲星逆行留犯守陵女天

子及大臣有疾女有奇政令

歲星犯虛四

甘氏曰歲星入虛天下大虛 巫咸曰歲星入虛中伺
其出日而數之二十日皆為兵發伺始入處之率一日
期十日軍罷 郝萌曰歲星入虛為天下大亂政急大
人憂有德令 荊州占曰歲星入虛百二十日已上有
功臣封立侯國邑其犯乘守其東西南北宰相有重誅
者必有德令 郝萌曰歲星逆行虛其君簡祭祀 石

氏曰歲星經虛齊國多美女 春秋圖曰歲星之虛五
穀大熟 邠萌曰歲星居虛歲多水五穀以水傷 又
曰歲星出入留舍虛一歲乃下更元年 齊伯五星占
曰歲星出入留舍虛十日不下天下苦 孝經章句曰
歲星守虛在東民多暴死守其北不占在其西其歲少
雨在其南王者宮中有憂宰相之家坐棄市 石氏曰
歲星守虛七日已上盡三十日王者起宗廟修陵家有
白衣之會不出九十日 甘氏曰歲星失色守虛天子

改服不出六十日 郝萌曰歲星守虛天下兵大起

又曰歲星守虛君將離散其卒多死亡 又曰歲星守

虛食貴民自賣 又曰歲星守虛三月已上有裂土受

爵者 巫咸曰歲星入虛留守之二十日不下有立諸

侯六十日不下國有死亡百日不下改年號大臣戮死

期二年 海中占曰歲星犯虛而守之王者以凶改服

有白衣之會不出六十日天下饑又民流千里君臣離

散 宋書天文志曰晉惠帝永寧元年七月歲星守虛危

二年十二月成都河間長沙王又討齊王同交戰攻焚

宮闕同兵敗夷滅又殺其兄上將軍寔以下二十餘人
大安二年成都政長沙於是公私饑困百姓力屈

歲星犯危五

郝萌曰歲星入危政在臣下期在四十日中 荊州占
曰歲星入危三月以上有受爵土者 又曰歲星入危
天下大亂若賊臣起 春秋圖曰歲星之危民不寧處
石氏曰歲星舍危南雨血膏王室 郝萌曰歲星出
入留舍危六十日不下國君死之 石氏曰歲星守危
三月若二十日諸侯兵起 甘氏曰歲星守危立諸侯

天子更宮室民多土功若有哭泣事 又曰歲星守危

民不寧 巫咸曰歲星守危徭役煩賦斂衆下屈竭莫

能俱不惡其上強凌弱兵起 又曰歲星守危為多盜

賊人民相惡 海中占曰歲星守危國有兵憂一曰兵

並起 郝萌曰歲星守危多雨為來歲損 又曰歲星

守危為大人盖屋事 郝萌曰歲星守危處其東民多

饑死 玉厯曰歲星守危七以上去之四尺外則王

者治宗廟高宮闕不出四十日 郝萌曰歲星守危其

君簡祭祀 玄冥占曰歲星入危守之百日不下穀貴
玄冥占曰歲星入危守之三十日不下諸侯兵起六
十日不下其國亡百日不下穀貴客軍將死 郝萌曰
歲星守墳墓為人主有哭泣之聲

歲星犯營室六

石氏曰歲星犯營室犯陽為陽有急犯陰為陰有急
郝萌曰歲星犯營室有土功之事 黃帝占曰歲星入
營室過而去人主有慶賜之事天下當有受爵祿者

郝萌曰歲星逆行營室其君用兵不時一曰其君不還
春秋圖曰歲星之營室田宅大賤 郝萌曰歲星處

營室東壁半赦其去陽之陰天下喜牢中虛 又曰歲

星處營室東壁北八月不移有兵七十日罷 又曰歲

星處營室東食貴處南春食賤處西南馬牛賤 海中

占曰歲星舍營室東民多徙去處其北民有憂 北官

候曰歲星宿營室不順正道其君吏不選者 郝萌曰

歲星出入留舍營室八十日不下其地半動九十日不

下有急令一曰大將出 齊伯五星占曰歲星出入留
舍營室主危 又曰歲星守之其國有急令 春秋緯
曰歲星守營室天下皆以饑為憂 春秋緯曰歲星守
營室其國有急令 孝經內記曰歲星守營室在其東
有喜事期四十日應在其北民憂期三十日在其西期
四月五月糴貴及黍貴十倍有銅弊之事在其南不占
石氏曰歲星守營室人君施不加親戚宮中有火災
人君不安 巫咸曰歲星守營室為民多病疾 海中

占曰歲星守營室三日以上王者去正殿居省室布恩
德赦有罪則無咎 郝萌曰歲星守營室為土功事釋
貴 又曰歲星守營室南有遷王一日立后 又曰歲
星守營室為大人忌以赦令解之 又曰歲星守營室
為宮中女有天死者 又曰歲星守營室中為后夫人
憂 玄冥占曰歲星守營室其年國有得地 帝覽嬉
曰歲星近守營室三日以上王者避正殿入省室二十
日以上至七十日王者自整三軍禦賊天下兵車行

石氏曰歲星犯守營室君有德者得地歸與民爵 郝
萌曰歲星犯守營室宮中有天死大人皆有土功之事
荊州占曰歲星犯守營室為女有宗廟事以赦解之
歲星犯東壁七

北官候曰歲星入東壁三月天下男子有慶賀君受爵
祿 郝萌曰歲星逆行東壁其君決獄不以時赦令不
明 石氏曰歲星居東壁五穀以水傷 春秋圖曰歲
星舍東壁人心不寧 郝萌曰歲星舍東壁北民憂期

二十五日 又曰歲星出入留舍東壁五十日不下大
人當之九十日不下土功大起百日不下國空有徙王
又曰歲星出入留舍東壁人民流亡不歸其鄉三十
日不下五穀貴 甘氏曰歲星守東壁王者有堯舜之
治四海同心 郝萌曰歲星守東壁人君施不加親戚
宮中有火災人君不安 又曰歲星守東壁諸侯相謀
又曰歲星守東壁為大人衛守 又曰歲星守東壁
為天下兵起一曰秋兵起 又曰歲星守東壁為有土

功事 又曰歲星守東壁為歲多晚水 荊州占曰歲
星守東壁去之九寸守四十日至百四十日王者好文
章天下舉用文士不出百八十日 陳卓曰歲星守東
壁天下大赦 玄冥占曰歲星守東壁天下大興有聖
主朝廷羣臣天下同心 河圖曰歲星逆行守東壁若
成勾己其君教令不明人心不寧木能害土故也

唐開元占經卷二十五

欽定四庫全書

唐開元占經卷二十六

唐 瞿曇悉達 撰

歲星占四

歲星犯西方七宿

歲星犯奎一

郝萌曰歲星入奎其年五穀以蟲為害居其南春糴賤
牛馬繒帛皆賤居其西糴貴凡物皆貴民不安海中

占曰歲星潤澤出奎有善令變色入奎有偽令來者若
出奎有偽令出使者 帝覽嬉曰歲星之奎有喜慶之
事若有赦令 石氏曰歲星居奎五穀以水傷處奎中
有土功之事 郝萌曰歲星處奎中有白衣之會 海

中占曰歲星處奎中小赦 帝覽嬉曰歲星舍奎南斗
馬繒布帛賤舍其北八月兵起七十二日罷或至三歲
乃罷 海中占曰歲星舍奎處其南春食賤處其東糴
乍賤乍貴民移徙不安處其西四月五月食貴處其北

民憂 齊伯五星占曰歲星出入留舍奎有小旱晚多水雨居左右者不占其中者外客軍且來矣 黃帝占

曰歲星守奎北夷來降 洛書曰歲星守奎三十日天

下道興符明 洛書曰歲星守奎五穀成熟 石氏曰

歲星守奎大饑 甘氏曰歲星守奎其國道興王者至

仁行忠臣並進天下三年而平 海中占曰歲星守奎

執法吏多死 海中占曰歲星守奎逆行旱五穀耗其

順行色潤澤即歲大熟 海中占曰歲星守奎南馬賤

一曰牛賤 郝萌曰歲星守天庫多獄貴人 又曰歲星守天庫以饑起兵若有客軍 又曰歲星守奎為有溝瀆事一曰有水事 荊州占曰歲星守奎王者憂之一曰大人當之 又曰歲星逆行守奎女子多死 河圖曰歲星入奎中而守之國有匿謀有兵起人主有憂若大臣當之 甘氏曰歲星逆行入奎而守之其君好攻戰兵甲不息人民流亡不安其居

歲星犯婁二

荊州占曰歲星入婁國有聚人若有喪期一年 海中

占曰歲星入居婁中小赦 春秋圖曰歲星之婁牛馬

大賤 郝萌曰歲星居婁五穀以水傷歲多水 海中

占曰歲星處婁南春食賤牛馬繒帛賤處其北八月兵

起七十二日罷遠期三年 郝萌曰歲星處婁北有奪

地之君處東金器貴 海中占曰歲星舍婁胃去婁舍

奎有赦 河圖聖治符曰歲星守婁天下赦 石氏曰

歲星守婁三十日不下天下平九十日不下國有兵穀

貴 甘氏曰歲星守婁王者承天得度天下安平 巫

咸曰歲星守婁王者承天位天下安寧有慶賀有兵罷

司馬彪曰歲星守婁為兵為匿謀 海中占曰歲星

守婁中又暈之大赦期九十日 巫咸曰歲星守婁民

多疾疫 郝萌曰歲星守婁有土功之事一曰大熱

又曰歲星守婁歲多獄貴人 又曰歲星守婁有死君

歲大饑 又曰歲星守婁有白衣之會 荊州占曰歲

星守婁東有徙民守其北有兵守其西不占守其陰牢

空天下有慶賀 又曰歲星守婁有德令牛馬多死苑
園空虚 玄冥占曰歲星守婁去之五尺以外守之十
五日以上至三十日王者出祀四海山川百神不出九
十日 西官候曰歲星守婁南春糴賤牛馬又賤皆在
歲月中守其東一貴一賤守其中有白衣之會又有小
赦 玄冥占曰歲星守婁六畜大貴其國尤甚 海中
占曰歲星逆行守婁甚其君牢吏獄斷不以時人多怨
訟若有赦令 感精符曰歲星入婁犯守之有白衣衆

聚三十日不下其國有兵九十日不下必有大喪期三年

歲星犯胃三

郝萌曰歲星犯胃為天下穀不實以食為憂 石氏曰
歲星經胃昴畢趙水滂魚行人道 春秋圖曰歲星之
胃其年早霜 又曰歲星處胃北八月兵起七十二日
罷遠三年 郝萌曰歲星處胃中有白衣之會處其南
男子疾一曰牛馬賤處其東民移徙不定若食貴 又

曰歲星舍胃是謂去陽之陰有喜牢空 荊州占曰歲
星宿之逆行胃其君不愛五穀 齊伯五星占曰歲星
入留守胃國家即妄動土功事不祥小人且亡絲綿布
帛有急令 郝萌曰歲星出入留舍胃兵起不用一曰
大人有憂一曰十月小旱 巫咸占曰歲星守胃為兵
灾萬物不成 黃帝占曰歲星守胃國以無義失幣有
水旱事 甘氏曰歲星守胃王者順天德中歲國昌
海中占曰歲星守胃歲大熱一曰五穀大熟 郝萌曰

歲星守胃趙兵伐中國 荊州占曰歲星守胃三尺以
外守入二十日王者開倉廩大賦天下轉運不出百八
十日 甄曜度曰歲星入胃犯守之國有更令大人有
憂若有禍殃必有土功 郝萌曰歲星犯守胃鄰國有
暴兵伐中國者 荊州占曰歲星犯胃國有變更之令
期四月又曰天下獄空 陳卓曰歲星犯守胃天下無
人

歲星犯昴四

甄曜度曰歲星入昴胡兵入國有土功若有赦令 郝
萌曰歲星入昴天下有白衣之會期六十日遠百二十
日 郝萌曰歲星入昴中小赦 西官侯曰歲星入昴
為金寶貴 春秋圖曰歲星之昴棺木大貴 郝萌曰
歲星乘昴若出北者為陰國有憂若外王死 郝萌曰
歲星居昴畢間赤色大旱一曰其國有大殃 又曰歲
星處昴南男子病歲旱旱水晚處昴北多暴雨處昴東
徙民 又曰歲星留之逆行昴其君殺不辜 荊州占

曰歲星舍昴處南有土功民多口舌 郝萌曰歲星入

留舍昴五十日不下必有死君期三歲若有死將期四

月 又曰歲星出入留舍昴其年早霜 齊伯五星占

曰歲星出入留舍昴胡人以出其國無兵禾豆耗布帛

貴 黃帝占曰歲星守昴東籬大貴三月復守北其國

有德令 孝經章句曰歲星守昴在其南籬一貴一賤

其月土功有死君變其政在其東金器刀劍貴在其北

有別離之國奪地之君若死在其西不占 甘氏曰歲

星守昴王者有德令昴者天之囚室歲星近之下獄之
臣皆有解者不出四十日 巫咸曰歲星守昴大饑為
萬物不成 又曰歲星守昴大旱多火災若有兵 海
中占曰歲星守昴天倉實 郝萌曰歲星守昴夷狄勝
中國 又曰歲星守昴北多暴雨 又曰歲星守昴東
行至天高復反至五車邊兵發一曰為赦令 石氏曰
歲星入若守天獄天下獄虛 河圖曰歲星犯守昴大
臣有坐法死者津關吏憂人民饑多食草實 郝萌曰

卷二十六
歲星中犯乘守昴為兵北征於狄一曰近臣為亂一曰
白衣之會 甘氏曰歲星守昴王者失禮陷於刑大赦
除咎 郝萌曰歲星中犯乘守昴天下有福一曰近臣
為亂

歲星犯畢五

黃帝占曰歲星犯畢出其北為陰國有憂出其南為陽
國有憂 聖洽符曰歲星入畢口將相憂大人當之期
不出百八十日 石氏曰歲星入畢中邊有兵 巫咸

曰歲星入畢中各伺其出日而數之期二十日為兵發
伺始入處之率一日期十日為軍罷 郝萌曰歲星入
畢為其國易主 又曰歲星入畢中邊有憂兵 西官
候曰歲星入畢中八十日若有百四十日人君謀兵大
起 石氏曰歲星出畢陽則旱出畢陰則水為政令不
行 郝萌曰歲星逆行畢其君畋獵不時若徒倚不明
其君不敬祠 春秋圖曰歲星之畢有德令 郝萌曰
歲星居畢昴間色赤大旱國有大殃在王一日在民

又曰歲星處畢北其歲有赦令有別離之國奪地之君
一曰歲星處畢南有土功男子多疾早旱晚水處畢東
多暴雨金器刀劍貴 又曰歲星出入留舍畢二十日
其國有以武致天下絲絮布帛大貴兩百斤千 荊州
占曰歲星出入留舍畢三十日不下人民流亡不反故
鄉 春秋圖曰歲星守畢王者出遊獵不出四十日兵
車行 石氏曰歲星守畢中國大赦王賜夷狄若有德
令一曰糴大貴 巫咸曰歲星守畢為大旱多水災

郝萌曰歲星守畢萬物不成國以饑亡 王歷曰歲星

入畢留守之三十日不下人君有謀大兵起有攻戰客

軍敗人民流亡不反其鄉期一年 陳卓曰歲星犯守

畢年穀小豐 西官候曰歲星犯守畢軍亂國有赦令

王者有賜夷狄若有謀兵期八十日若二百四十日

陳卓曰歲星犯畢附耳兵起若將相有喪憂也若不即

免退

歲星犯觜觿六

石氏曰歲星犯觜觿萬物不成 石氏曰歲星犯觜觿
其國兵起天下動移 郝萌曰歲星入觜觿中伺其出
日而數之期二十日兵發伺始入處之率一日期十日
軍罷 郝萌曰歲星入觜觿五穀更貴更賤歲一旱一
水天氣不和調一曰有兵 郝萌曰歲星入觜觿多盜
賊 又曰歲星逆行觜觿其國君誅罰不當 春秋圖
曰歲星之觜觿兵器大貴 洪範傳曰歲星舍觜觿為
白衣之會 郝萌曰歲星入留觜觿六十日不下禾豆

半傷九十日不下侯王見功 又曰歲星出入留舍觜
觜二百日不下客軍大敗主人大勝一曰山林空 石
氏曰歲星守觜觜三日以上王者大將軍出兵在道
石氏曰歲星守觜觜國有反者民疫天下大饑 又曰

歲星守觜觜西方客動侵地欲為君主崇禮以制義則
國安 又曰歲星守觜觜君臣和同 荊州占曰歲星

守觜觜妖怪起丁壯多暴死 玄冥占曰歲星守觜觜

大臣且亡

魏時木守觜觜
後諸葛公亡

齊伯五星占曰歲星守觜

觜六十日五穀傷九十日兵起 石氏曰歲星犯守觜
觜不出一旬民病瘥 海中占曰歲星犯守觜觜不出
一旬必有偵候之事農夫不耕天子皇后俱崩期甲辰
日 玉歷曰歲星犯守觜觜三十日五穀傷其國大饑
民多餓天下大疫農夫不耕婦女不績


歲星犯參七

石氏曰歲星犯參水旱不時 聖洽符曰歲星入參天
子更布政宰相不安期六月 郝萌曰歲星逆行參其

君誅罰不當 又曰歲星逆行若留上衡中為兵革起
黃帝占曰歲星處參東若處伐東多走民多暴雨處
參西若處伐西多流民從東方來處參北若伐北衡水
郝萌曰歲星處參南若處伐南為易君一曰大人多
寒熱之疾處參北國有易相處參東若伐東晚稼不成
處參西若伐西產子者多死一曰老人多死 荊州占
曰歲星處參所近者是王者欲封為遠國君也期一年
郝萌曰歲星宿參若宿伐者為有反臣中兵也 荆

州占曰歲星入參七日以上至七十日王者欲出之他國不出百八十日 石氏曰歲星守參國有反者五穀更貴 又曰歲星守參天下農夫不耕 又曰歲星守參有赤星出參中邊有兵 甘氏曰歲星守參其歲大疫王者恐疫木入金其君危 荊州占曰歲星守參多雨歲惡 巫咸曰歲星守參萬物不成民大饑 海中占曰歲星守參多盜賊高田貴下田賤其年樹木多爛 郝萌曰歲星守參晚稼不成 海中占曰歲星守參

后夫人當之一曰天下有兵驚一曰旱人民多病 春
秋圖曰歲星入參犯守之其國以兵致天下退而守之
士卒有驚若離散五穀貴一曰水火為敗 郝萌曰歲
星入參守伐天下有兵驚不足傷民天下受兵事



唐開元占經卷二十六

欽定四庫全書

子部

唐開元占經卷二十七至二十九

詳校官中書_臣李采

靈臺郎_臣倪廷梅覆勘

總校官編修_臣王熙緒

校對官庶吉士_臣潘曾起

謄錄監生_臣任楫文

欽定四庫全書

唐開元占經卷二十七

唐

瞿曇悉達撰

歲星占五

歲星犯南方七宿

歲星犯東井占

黃帝占曰歲星入東井軍在外歲星進兵退歲星退兵

進 郁萌曰歲星入東井一南一北侯王憂又曰害於

泰稷 黃帝占曰歲星入東井留二十日以上易正朔
又曰天下有土功川瀆之事期十月若十一月又
曰居其東五穀不成居其南國君病諸侯多死居其西
者及兒子多死居其北有改令 黃帝占曰歲星出入
留舍東井三十日天下一國有水者 陳卓曰歲星在
東井兵起近期一年遠五年 黃帝占曰歲星中犯東
井人君有戮者 陳卓曰歲星犯守東井王者法令急
多獄事其年大水民饑天下改令 郝萌曰歲星中犯

乘東井其國內外有兵起

案孝武帝政和二年四月乙卯歲星在東井占曰兵起近

期一年遠五年到三年正月匈奴入五原酒泉殺兩都尉三月遣將軍廣利七萬人出五原御史大夫高成將兵三萬人出河西重合保馬通將四萬騎出酒泉與虜戰多斬首廣利敗匈奴積三年又案魏甘露三年三月庚子歲星順行犯東井距星占曰兵起到景元元年已丑太后令曰昔日立東海王子懿悖逆不道自陷大禍以民禮葬之京師

荊州占曰歲星去東井七寸七

嚴兵積二年三月

日以上至一百五十日則王者用法大臣修度天下和

平 石氏曰歲星守東井河溢 甘氏曰歲星守東井

法令急多獄事其年大赦 黃帝占曰歲星守東井歲

大饑人民疾病

黃帝占曰歲星守東井南男子多寒

熱病

郝萌曰歲星守東井大人多病若有喪守其北

多暴雨

又曰歲星守東井若將相死一曰君死又曰

糴貴

石氏曰歲星守東井旱

荊州占曰歲星守東

井道上多死人

黃帝占曰歲星守東井水

郝萌曰

歲星守東井百物五穀不成久守之金錢易

陳卓曰

歲星守東井百川皆溢

郝萌曰歲星入若守東井有

土功事

又曰歲星入犯乘守東井留三日以上其歲

諸侯當之 感精符曰五精入東井從歲星聚殺白而

發黃神奉絕用兵卒亂以義得天下 石氏曰歲星逆

行東井有兵 一曰歲星守東井有兵 紫宋書天文志曰晉永興二年九月

歲星守東井占曰有兵井又秦分也是年荀晞破公師
舊張方破范陽王虓關西諸將攻河間王顥顥奔走東

海王迎殺之 郝萌曰歲星逆行東井其君出入不時 陳

卓曰歲星逆行東井山川壅塞 又曰歲星中犯乘守

東井若鉞人君有戮死者 又曰歲星環繞鉞諸侯誅

一曰赦 紫魏武帝甘露二年八月壬午歲星犯鉞其年九月庚寅歲星逆行井鉞到三年征東將軍諸

葛誕誅積
六月應

黃帝占曰歲星入鉞大臣誅一曰歲星入

鉞賢相死

郝萌曰歲星干鉞者為斧鉞用 又曰歲

星中犯乘守鉞其國內亂兵起

歲星犯輿鬼二

郝萌曰歲星入輿鬼相誅 巫咸曰歲星入輿鬼為十

日以上金錢大散於諸侯期六十日若十月 石氏曰

木入輿鬼大臣誅一曰亂臣在內

案漢孝武帝後元二年十月戊午歲星在

輿鬼中占曰大臣有誅者一曰有金錢之賜今近期一年遠五年到昭帝始元二年二月賜諸侯王列侯進宗

室金錢各有差七月賜天下民牛酒到四年六月復賜丞相以下至郎吏錢帛各有差廷尉李种有罪棄市在期內如占說又案漢宣帝元康二年六月歲星入與鬼到四年三月乃出占曰歲星入與鬼滿數十日金錢帛之施諸侯一曰大臣誅一曰歲樂糴石三四十錢一曰有大喪近期一年遠五年其月詔賜天下將吏二千石諸宗室高年錢帛男子爵女子牛酒是比年豐穀石五錢大司馬衛將軍張安世薨到神爵二年司隸尉蓋寬饒有罪自殺又案魏甘露四年四月甲申木犯與鬼東南星東南星主兵占曰木入與鬼大臣有誅者金錢之令到景元元年五月尚書王經伏誅到六月當逆鄉公即位賜天下民爵積一年二月也

石氏

曰木犯守鬼積尸邦有兵犯南星王有疾崩若戮死者近布帛發布帛近金錢發金錢近馬發馬近兵發兵七

寸以內為近其守之三日以上所發明審也 又曰歲

星逆行出鬼陽男坐之陰女坐之出鬼左貴女坐之右

為貴人坐之抵其中央君坐之 郝萌曰歲星去五諸

侯入輿鬼諸侯世子有疾死者期六十日去天高入輿

鬼不出百二十日大人惡之 石氏曰歲星出入留舍

輿鬼五十日不下有大喪六十日不下國相不明百日

不下民半死 郝萌曰歲星舍輿鬼東北麻豆成稻不

成舍東南豆麥熟有渴死人舍西南萬民多喪舍西北

黍稷成麥不成早蠶不熟晚蠶熟舍中歲樂石三四錢
黃帝占曰歲星處輿鬼南有易君處其北國易相處
其西殺老人一曰殺姪子者 甘氏曰歲星犯輿鬼人
君必有所戮 巫咸曰歲星守輿鬼天子賜諸侯金錢
郝萌曰歲星守輿鬼五穀多傷民以饑死者無數又
曰多狂病死者 海中占曰歲星守輿鬼角動有殺主
者色黑誅死不成 石氏曰歲星犯天尸國有兵王者
病疾一曰人君有戮死者 海中占曰木守鬼出其北

旱出其南雨水五穀熟 郝萌曰歲星逆行與鬼其君
不聰明用財奢浮過度治衰 荊州占曰歲星逆行與
鬼其君不聰於事 荊州占曰歲星入輿鬼財寶出

荊州占曰歲星入輿鬼亂臣在內有屠城 郝萌曰歲

星乘質鉞用 荊州占曰歲星乘質君貴人憂金玉

用人民多疾從南入為男從北入為女從西入為老人

從東入為丁壯若棺木倍價 司馬彪天文志曰歲星

入輿鬼為死喪 荊州占曰歲星干犯守輿鬼者皆為

天下有大喪陽為后左為天子右為貴臣又隨所守主物王者發之不出七十日 石氏曰歲星守輿鬼為大人有祭祀事 郝萌曰歲星守輿鬼大人以命終 又曰歲星守輿鬼西南皆為秦漢有反臣以赦解之

歲星犯柳三

郝萌曰歲星入天庫以饑起兵一曰五穀收入 石氏曰歲星入柳諸侯有慶賀天下安寧五穀豐熟不出其年民人歌舞而行 又曰歲星處柳東晚稗不成處其

南有易君處其西殺老人一曰殺姪子一曰民疾處其
北貴人徙一曰國易相 又曰歲星處柳南地必動處
其西民疾歲大水一曰大人坐 甘氏曰歲星守柳貴
臣得地有德令不出九十日 石氏曰歲星守柳人饑

巫咸曰歲星守柳多水災萬物五穀不成 郝萌曰

歲星守柳多獄不然獄空 又曰守天相政事急民有

千里之行 陳卓曰歲星逆行柳陰女主坐之逆行柳

中其君坐之若逆行柳陽男坐之若逆行柳左右坐貴

親 郝萌曰歲星與柳合同光其國將大強 荊州占
曰歲星與熒惑合柳歲星色赤兵起黃白五穀傷黑為
憂青而角赤兵起近期三十日遠六十日 郝萌曰歲
星守柳有反臣中兵也 海中占曰歲星居柳歲和熟
又曰歲星出入留舍柳九十日不下將軍出 又曰
歲星逆行柳其君不敬祭祀

歲星犯七星四

荊州占曰歲星入七星五穀多傷天下盜賊起期一年

陳卓曰歲星出入留舍七星其國有以義致天下

郝萌曰歲星居七星歲和同 又曰歲星處七星民疾

處其西歲水 陳卓曰歲星犯七星天子憂兵功臣受

封 甘氏曰歲星守七星皇天以祐王者其邦獲五福

九十年 陳卓曰歲星與七星同光者以粟當錢 巫

咸曰歲星守七星旱多火災萬物五穀不成有兵饑

海中占曰木犯七星使者滿道子弑父臣弑主 荊州

占曰歲星犯七星王者敬天宗廟有禮天下和平 郝

萌曰歲星逆行七星其君衣服不法 荊州占曰歲星
逆行七星處其南地伏動處其西大人坐之處其北貴
人徙 黃帝占曰木犯七星逆臣為亂 郝萌曰歲星
逆行七星地動 黃帝占曰木守七星為反臣也一曰
夏物不成 石氏曰木守七星有兵 郝萌曰歲星守
七星反臣中兵也 甘氏曰歲星入七星有君置太子
者 郝萌曰歲星留守七星天下大憂憂中央

歲星犯張五

石氏曰歲星入張天子有慶賀之事天下大樂穀大豐
荊州占曰歲星入張不出一年天子有慶賀之事天
下大樂 巫咸曰歲星入張星多火災萬物五穀不成
郝萌曰歲星出入留張舍三十日不下有兵六十日
不下更立侯王 石氏曰歲星守張民人病疫一曰其
歲民多心腹疾 郝萌曰歲星居張歲和熟 甘氏曰
歲星守張其國大豐守之一年七年昇平君臣同心
又曰歲星處張南地必動若六畜貴處張西其歲水

荊州占曰歲星守張四十日至百二十日陰陽和羣臣
忠良王者吉 郝萌曰歲星守張政事急民有千里之
行一曰貴人死 荊州占曰歲星逆行張其君衣服不
法 郝萌曰歲星逆行張其君用樂淫佚 又曰歲星
守張有反臣中兵也 荊州占曰歲星與墳星合於張
歲不和貴人多內喪一曰大水六年 郝萌曰歲星與
墳星合於張天下有變不傷為政者則害於民一曰民
憂盜賊若功臣受封 又曰後且大旱 荊州占曰歲

星與墳合守張天下易令民流千里

歲星犯翼六

石氏曰歲星入翼五穀風傷期一年 郝萌曰歲星出

入留舍翼六十日不下地亡六十里 石氏曰歲星出

入留舍翼且有急事徵召 郝萌曰歲星居翼歲和熟

石氏曰歲星守翼有兵若大水一曰川枯不通 甘

氏曰歲星守翼聖臣代主 荊州占曰歲星守翼王道

大興王者得天心將相忠良不出九十日文術大用

郝萌曰歲星守翼南六畜貴海中占曰歲星守翼處其東魚鹽瓦器貴處其南車貴處其西不占處其北五穀不成郝萌曰歲星逆行翼其君用樂淫佚若失火甘氏曰歲星入翼有海客郝萌曰歲星入翼四海有急國憂石氏曰歲星守翼萬物不成石氏曰歲星守翼人民流亡

歲星犯軫七

郝萌曰歲星入軫天下多喪荊州占曰歲星入軫邦

有將死期六年 陳卓曰歲星入軫兵大起 荊州占

曰歲星在軫王者憂疾不出九十日 巫咸曰歲星入

軫中伺其出而數之期二十日為兵發伺始入處之率

一日期十日軍罷 郝萌曰歲星舍軫七日不移赦

黃帝占曰歲星處軫東耀貴處軫西有女喪有水 海

中占曰歲星犯守軫天子養孤老不平大臣背叛師旅

起車騎盡發 荊州占曰歲星干犯守軫大臣戮死

甘氏曰歲星守軫國主疾王者修宗廟赦三百里內則

災消 巫咸曰歲星守軫民多疾病 海中占曰歲星
守軫主庫者有罪 郝萌曰歲星守軫有土功事若旱
萬物不成民饑 黃帝占曰歲星守軫南六畜皆貴
郝萌曰歲星守軫北五穀不成 荊州占曰歲星逆行
軫失火 郝萌曰歲星逆行軫其君持喪服不謹若貴
親坐之 又曰木守軫川楫不通也

唐開元占經卷二十七

欽定四庫全書

唐開元占經卷二十八

唐 瞿曇悉達 撰

歲星占六

歲星犯石氏中官

歲星犯攝提一

海中占曰歲星犯攝提臣謀其君若主出走有兵起期
一年

歲星犯大角二

海中占曰歲星守大角臣謀主者有兵起人主憂王者戒慎左右期不出百八十日遠一年

歲星犯梗河三

巫咸曰歲星守梗河國有謀兵四夷兵起來侵中國邊境有憂

歲星犯招搖四

聖洽符曰歲星犯招搖邊兵大起敵人為寇若守之敵

人敗敵人死期不出二年 荊州占曰歲星入招搖兵起馬多死

歲星犯玄戈五

聖洽符曰歲星守犯玄戈邊兵大起哭厥為寇若守之哭厥敗若其主死期不出三年

歲星犯天槍六

巫咸曰歲星犯守天槍星邊夷兵起機槍大用防戍有憂若誅邊臣期不出年

歲星犯天棓七

巫咸曰歲星守天棓邊夷兵起機槍大用防戍有憂若誅邊臣期不出年

歲星犯女牀八

荊州占曰歲星犯女牀凶 甘氏曰歲星守女牀兵起宮中若妃后暴誅者期百八十日遠一年

歲星犯七公九

黃帝占曰歲星守七公為民饑君不安 石氏曰歲星

犯守七公輔臣有謀議臣相疑若有誅者主人有憂

歲星犯貫索十

巫咸曰歲星犯守貫索天下亂兵大起有獄事貴人有死者石氏曰歲星入天牢中犯乘守者以獄為亂多不平

歲星犯天紀十一

文曜鉤曰歲星犯守天紀幸臣執權有兵起王者有憂

歲星犯織女十二

黃帝占曰歲星守織女天下有女憂有兵起不出其年

歲星犯天市十三

郝萌曰歲星入天市中五官有憂一曰赦 平咸曰歲

星入天市諸侯有戮者將相凶期百八十日若一年

郝萌曰歲星入天市諸侯有戮者一曰弊易 海中占

曰歲星入天市五官有憂若市驚一曰易市 石氏曰

歲星守天市諸侯相謀若國有兵憂 郝萌曰歲星守

天市五穀大貴

歲星犯帝座十四

石氏曰歲星犯帝座為臣謀主有逆亂事 玄冥曰歲星犯帝座為臣謀主天下亂兵大起不出年

歲星犯候星十五

海中占曰歲星犯守候星陰陽不和五穀傷人大饑有兵起

歲星犯宦者十六

甘氏曰歲星犯宦者左右輔臣誅若戮死期不出年

歲星犯宗正十七

石氏曰歲星犯守宗正左右羣臣多死若更政令人主有憂

歲星犯宗人十八

石氏曰歲星犯守宗人親族貴人有憂若有死者一曰人主親宗有離絕者

歲星犯宗星十九

甘氏曰歲星犯守宗星宗室之臣有分離者

歲星犯東西咸二十

石氏曰歲星犯守東西咸為有臣不從令有陰謀

歲星犯天江二十一

巫咸曰歲星犯守天江下有水若入之大水齊城郭人民饑亡去其鄉

歲星犯建星二十二

陳卓曰歲星入建星臣相譖 石氏曰歲星入建星諸侯有謀入闕者期六十日若百五十日 文曜鉤曰歲

星守建星闕梁不通天下大饑人相食期二年 石氏
曰歲星守建星糴貴人相食 海中占曰歲星守建星
早死者甚衆民大耗 郝萌曰歲星守建星天下多暴
貴一曰牛貴 郝萌曰歲星守建星天下之人有相食
者以百數一歲不發三年乃發三年不發六年乃發六
年不發九年乃發郡國有坐之 又占曰歲星守建星
為臣謀其主 又占曰歲星守建星地氣泄貴人多死
又占曰歲星守建星歲水民饑有自賣者

歲星犯天弁二十三

甘氏曰歲星犯天弁若守之則囚徒兵起一曰五穀不成糴大貴人民饑

歲星犯河鼓二十四

齊伯五星占曰歲星犯河鼓大將若左右將有誅者若守之將有罪以五色占之石氏曰歲星入守河鼓諸侯之將出大兵起旗鼓用人主憂期一年

歲星犯離珠二十五

石氏曰歲星犯離珠宮中有事若有亂宮者若宮中人
有罪黜者

歲星犯匏瓜二十六

聖洽符曰歲星守犯匏瓜天下有憂若有遊兵各葉貴
一曰魚鹽貴價十倍不出其年

歲星犯天津二十七

海中占曰歲星犯天津關道絕不通有兵起若關吏有
憂 郝萌曰歲星守天津者皆革也

歲星犯螣蛇二十八

甘氏曰歲星守螣蛇天子前驅凶若奸臣有誅前驅為害

歲星犯王良二十九

石氏曰歲星守王良為有兵 齊伯五星占曰歲星犯守王良天下有兵諸侯放強臣謀主期不出年

歲星犯閭道三十

石氏曰歲星犯閭道絕漢者為九州異政各主其王天

下有兵期二年

歲星犯附路三十一

石氏曰歲星守附路大僕乃罪若有誅一曰馬多死道

無乘馬者

歲星犯天大將軍三十二

郝萌曰歲星入天將軍者吉 石氏曰歲星守犯天將

軍為大將死若誅

歲星犯大陵三十三

石氏曰歲星入大陵國有大喪大臣有誅若戮死人民死者大半皆不出其年 荊州占曰歲星乘大陵天下盡喪死人如岳

歲星犯天船三十四

郝萌曰歲星守天船皆革也 聖洽符曰歲星入守天船兵大起舟船用有亡國期不出年

歲星犯卷舌三十五

石氏曰歲星乘卷舌天下多喪 又占曰歲星入守卷

舌有佞臣謀其君以口舌為害人主有憂

歲星犯五車三十六

石氏曰歲星犯五車大旱若有喪一曰犯庫星兵起北方若西方犯倉星穀貴若有水海中占曰歲星入五車兵大起車騎行五穀不成天下民饑若軍絕糧郝萌曰歲星入五車向其傍糴石三百當其門糴石五百入其中糴千錢荊州占曰歲星入五車天庫天下兵起一曰若有水孝經右祕曰歲星入五車王義絕亂

帝家 石氏曰歲星中犯乘五車若入天庫以饑起兵
荊州占曰歲星入五車中犯乘守天庫星水饑兵起

歲星犯天關三十七

石氏曰歲星守天關臣謀主若大臣有不道者有兵起
期二年 郝萌曰星守天關為貴人多死 海中占曰

歲星守犯天關道絕天下相疑有闕梁之令

宋書天文志曰晉

康帝建元元年歲星犯天關安西將軍庾翼與兄永書曰歲星犯天關占云闕梁當淹塞比來江東無他故江道亦不艱而石唐頻年閉關夫關閉不通信使此復是天公憤憤無皂白之徵

石氏曰歲星

守天關歲水民饑有自賣者 郝萌曰歲星行不從天
關不出其年有兵

歲星犯南河北河戌三十八

石氏曰歲星行南河戌中為四方兵起百姓疾病 黃
帝占曰歲星乘南河戌若出南河南為中 石氏曰歲
星守南河蠻夷兵起邊戌有憂若有旱災人民饑 郝
萌曰歲星守天高天下赦 歲星逆行天高其君齋戒
不謹 黃帝占曰歲星若留止守南河戌為百姓疾病

一曰為旱 歲星行南河戌中若留止南河戌皆為喪
歲星出北河若乘北河戌為女喪 黃帝占曰歲星
乘北河戌若出北河戌北外國王死 玄冥占曰歲星
守北河朔方兵動若守之三十日不下北兵敗若北主
死天下大水人民饑期不出二年 巫咸曰歲星守北
河大臣有憂若邊臣有罪若有戮死者 郝萌曰歲星
經南河之南刑法復暴誅伐不當經北戌之北以女子
金錢貪色奢侈失治道近期三年中期六年遠期九年

而災至 黃帝占曰歲星出北河戌間若留守北若居
南戌間若守兩間為天下有難起道不通 荊州占曰
歲星守兩河間天下乖離道路不通 郝萌曰歲星有
不行入天關間為喪

歲星犯五諸侯三十九

石氏曰歲星犯五諸侯若守之兵大起將士出諸侯有
憂若有死者 巫咸曰歲星入五諸侯伺其出日而數
之若二十日兵發伺始入處之率一日期十日軍罷

玄冥占曰歲星守北諸侯臣有謀主者若議臣不忠若有罪黜期一年 石氏曰歲星中犯乘守五諸侯兵死期三年 郁萌曰歲星中犯乘守五諸侯為所中乘守者誅若有殃期三年兵發

歲星犯積水四十

巫咸曰歲星犯守積水其國有水災物不成魚鹽貴一曰以水為敗糶大貴人民饑期二年

歲星犯積薪四十一

甘氏曰歲星守積薪天下大旱五穀不登人民饑亡

歲星犯水位四十二

郝萌曰歲星犯水位大水一曰出其南大旱 石氏曰

歲星犯守水位天下以水為害津關不通一曰大水入城郭傷人民皆不出其年

歲星犯軒轅四十三

郝萌曰歲星出東陵有青龍出左右若宮中者 石氏曰歲星在軒轅中有以女子請人君者 黃帝占曰歲

星行軒轅中犯女主女主失勢

失勢者憂喪也

列大夫有放逐

者五官有不治者色悴為憂為疾其所中犯乘守者誅

若有罪 歲星中犯女主者皆為女主當之其守犯女

主女主有憂

案宋書天文志曰宗元嘉十四年七月辛卯歲星入軒轅其後皇后袁氏崩

荊州占曰歲星守軒轅女后有以子諍者 巫咸曰歲

星行犯守軒轅女主失政若失勢一曰大臣當之若有

黜者期二年 玉歷曰歲星犯守軒轅女主有憂其君

失政威令不行後宮不安期一年

司馬彪天文志曰孝桓延熹七年八月庚申

歲星犯軒轅大星八年二月癸亥皇
后鄧氏生執左道廢遷於祠宮死

石氏曰歲星入

軒轅中犯乘守之有逆賊有火災 歲星犯乘守軒轅
太民星大饑大流太后宗有誅者若有罪中犯乘守少
民星小饑小流皇后宗有誅者若有罪 荊州占曰歲
星中犯乘守軒轅左右角皆為大臣當之

歲星犯少微四十四

石氏曰歲星入少微君當求賢佐不求賢佐則失威奪
勢矣 歲星犯守少微名士有憂王者任用小人忠臣

被害有死者 黃帝占曰歲星入犯乘守少微宰相易

歲星入中犯乘守少微女主憂 石氏曰歲星入中

犯乘守少微五官亂宰相有憂

歲星犯太微四十五

帝覽嬉曰歲星行犯太微左右執法為大臣有憂 郝

萌曰歲星犯左右執法執法者誅若有罪

班固天文志曰哀帝元壽

元年十一月歲星入太微逆行于右執法二年十月戊寅高安侯董賢免大司馬位歸第自殺 司馬彪天文

志曰孝桓延熹九年十月癸酉歲星犯左執法十一月戊午歲星入犯左執法其九年十一月荊州刺史李阼等

皆京市至永康元年十二月太傅陳蕃大將軍實武等皆枉死也

荊州占曰歲星道

從太微西蕃北南方星間入致南蕃東方星間南出道
中西蕃直坐入者非道也 歲星以壬子日慎入太微
天廷中天子所使也不以壬子日入非天子使 郝萌
曰歲星當太微門為受制當左執法為受事左執法當
右執法受事右執法守太微門三日以下為受制三日
以上為兵為賊為亂為饑 荊州占曰歲星出東掖門
為相受命東南出德事也出西掖門為將受命西南出

刑事也期以春夏 齊伯占曰歲星入太微執道而出
王者有福諸侯有受賜爵封者 黃帝占曰歲星入天
廷色白潤澤為期百八十日有穀歲星東行入太微廷
中出東門天下有急兵若守將相御史大臣有死者若
入端門守廷大禍至入南門出東門國大旱若入南門
逆行出西門有大水逆入東門出西門大國破亡若順
入西蕃而留不去楚國凶殃 合誠圖曰歲星入華闕
門者為臣殺之候之 石氏曰歲星入太微中華東西

門若左右掖門而南出端門者必有反臣 歲星入太
微西門出東門為人君不安欲求賢佐有入中華西門
出中華東門為臣出令有入太陰西門出太陰東門為
天下大亂有喪若大水 郝萌曰歲星入太微西門犯
天廷出端門皆為大臣伐主入西門而初出右掖門皆
為大臣假主之威而不從主命 歲星入西華門出端
門為臣詐稱詔 荊州占曰歲星入太陰西門若端門
出東門貴者奪威勢 歲星與五星俱會太微宮中成

勾已而光不相及者三王九侯亡一曰名臣爭為主更相殘賊 歲星入太微天廷出端門臣不臣 歲星入太微宮為天下大驚一曰有兵 歲星入天廷國不安其宮 司馬彪天文志曰歲星入太微人主改政 巫咸曰歲星逆行入太微天廷中為大臣有誅若諸侯戮死期二年 石氏曰歲星逆行太微之中及出入左右掖門為有逆謀天子有命將征伐之事一曰大赦可以解其患 歲星逆行入太陽東門若入中華門人主改

政非次天下不安 郝萌曰歲星逆行入左掖門為臣

劫其主有入東華門至黃帝座出西門為臣欲謀主不

成 玉厯曰歲星逆行入太微強臣凌主諸侯兵起

荊州占曰歲星主東方南逆行入太微東南隅星之北

為南方入二星之北為東方 黃帝占曰歲星留於太

微守三十日以上為必有兵革天下大赦 荊州占曰

歲星入太微從右二十日以上人主大不安有大憂

案宋

書天文志曰魏黃初五年歲星入太微逆行積百四十
九日乃出至七年五月文帝崩明帝即位大赦天下

荊州占曰歲星入太微從右入七日以上為人主憂

司馬彪天文志曰孝桓延熹九年正月壬辰歲星入太微中五十八日出端門永康元年十二月丁丑桓帝崩

歲星道南蕃入留止南門為大臣有憂 歲星留太微
迂中為天下大憂中央留十日以上皆為天下有亡徒
為兵者 陳卓曰歲星入太微犯左右執法將相執法
者有憂若死亡近期一年遠五年 荊州占曰歲星入
太微天迂所中犯乘守者殺若有罪各以守官名之
歲星食太微東西蕃四輔臣有誅者若君臣失禮

歲星犯黃帝座四十六

石氏曰歲星犯黃帝座改正易王天下亂存亡半 又

占曰歲星逆來犯黃帝座王者惡之禍成矣期三年

郝萌曰歲星干犯黃帝座非其主立天下不安 荊州

占曰歲星入黃帝座其色白者為有赦 又占曰歲星

逆行入太微天廷中為諸侯將有戮上者至黃帝座而

成不至黃帝座而還有謀不成以其入日占國 又占

曰歲星中黃帝座為大人易天下大亂 又占曰歲星

觸黃帝座主賊 黃帝占曰守黃帝座大人憂

歲星犯四帝四十七

石氏曰歲星犯守四帝臣謀主去之一尺事不成 玉
歷曰歲星入太微犯四帝辟憂君也 甘氏曰歲星中
犯乘守四帝座天下亡

歲星犯屏星四十八

甘氏曰歲星犯守屏星君臣失禮下而謀上一曰大臣有
戮死者 石氏曰歲星中犯乘守屏星為君臣失禮而

輔臣有誅者若免罷去

歲星犯郎位四十九

甘氏曰歲星犯守郎位輔臣有謀左右宿衛者為亂王者宜備之

歲星犯郎將五十

巫咸曰歲星犯守郎將命曰陵陵則將有誅若將憂一曰大臣為亂誠慎左右 荊州占曰歲星犯乘守郎將且有以符節為姦者 又占曰歲星中犯乘守郎將必

有不還之使

歲星犯常陳五十一

甘氏曰歲星犯守常陳守衛有謀兵起宮中天子自出行誅期百八十日遠一年

歲星犯三台五十二

王歷曰歲星入犯上台司命近臣有罪若有誅一日近臣有逃走者以五色占色黃當日無故青黑憂死喪期一年 郝萌曰歲星犯守上台改年易紀大尉死不則

天子惡之中台司徒病下台司空期百日若七十日丙子日 文曜鉤曰歲星犯守中台司中奸臣有謀若誅者中公當之 巫咸曰歲星犯守下台司祿近臣有罪若出走黑死者

歲星犯相星五十三

石氏曰歲星犯相星輔臣凶

歲星犯太陽守五十四

甘氏曰歲星犯守太陽守大臣戮死若有誅謀不出年

歲星犯天牢五十五

海中占曰歲星犯守天牢王者以獄為弊貴人多繫者

歲星犯文昌五十六

石氏曰歲星入文昌天下兵起其君不安若有走主

歲星犯北斗五十七

聖洽符曰歲星入北斗口中天下大亂改政易王國有
大喪期三年 巫咸曰歲星入北斗若守之貴臣受殃

郝萌曰歲星入守北斗貴人有繫 荊州占曰歲星

守北斗天子惡之 荊州占曰歲星守北斗不出一年
其歲大水一曰大赦

歲星犯紫微宮五十八

海中占曰歲星入長垣天子以兵自衛強臣凌主一曰
叛臣被誅若戮死期不出百八十日 玄冥占曰歲星
入紫微宮奸臣有謀兵起宮中天下亂人主憂期二年
巫咸曰歲星守紫微宮民莫處其室宅流移去其鄉
歲星犯北極鉤陳五十九

石氏曰歲星犯守北極主星必有大喪若有反臣玉
歷曰歲星犯守太子星太子憂若有罪犯守庶子庶子
憂若有罪 荊州占曰歲星中犯乘守北極主星為大
人憂 黃帝占曰歲星犯守鈞陳後宮亂兵起宮中幸
臣謀主者憂

歲星犯天一六十

石氏曰歲星犯守天一倖臣有謀人主憂

歲星犯太一六十一

石氏曰歲星犯守太一幸臣有謀有兵起人主憂

唐開元占經卷二十八

欽定四庫全書

唐開元占經卷二十九

唐 瞿曇悉達 撰

歲星占七

歲星犯石氏外官一

歲星犯庫樓一

黃帝占曰歲星犯庫樓兵出一曰民饑舉兵 巫咸曰
歲星入庫樓其國以饑起兵若有旱灾期不出年

歲星犯南門二

荊州占曰歲星守南門王者出畋獵不出三十日 石氏曰歲星犯守南門夷兵起若路不通

歲星犯平星三

石氏曰歲星犯平星凶 甘氏曰歲星守平星執政臣憂若有罪誅者期一年

歲星犯騎官四

甘氏曰歲星犯守騎官有兵起馬多發若多死

歲星犯積卒五

石氏曰歲星入積卒若守之兵大起士卒大行若多死

期二年

歲星犯龜星六

海中占曰歲星犯龜星天下有水旱之災守陽則旱守陰則水

歲星犯守傳說七

石氏曰歲星犯守傳說王者簡宗廟廢五祀後宮凶一

曰有絕嗣期不出三年

歲星犯魚星八

甘氏曰歲星犯守魚星之陽為大旱魚行人道犯守魚星之陰為大水魚鹽貴

歲星犯杵星九

海中占曰歲星入杵星若守之天下有急發米之事不出其年

歲星犯鼈星十

黃帝占曰歲星守氐星為有白衣之會 石氏曰歲星
守氐星有白衣若聚衆若大水 巫咸曰歲星守氐星
國有水旱之災守陽則旱守陰則水

歲星犯九坎十一

石氏曰歲星守九坎天下旱名水不水五穀不登人民
大饑一曰之陰大水之陽大旱

歲星犯敗白十二

石氏曰歲星守敗白民不安其室憂失其釜甑若流移

去其鄉

歲星犯羽林十二

海中占曰歲星入守羽林有兵起若有逆行變色成鉤已天下大兵關梁不通不出其年 郝萌曰歲星入守

羽林有反臣中兵起也 玄冥占曰歲星入守羽林諸

侯悉發兵強臣謀主王者憂期二年

案宋天文志曰晉安帝義熙五年五

月戊戌歲星入羽林是年四月高祖討鮮卑西虜
攻安定姚略自以大衆救之六年二月鮮卑滅

石

氏曰歲星入天軍諸侯悉發甲兵一曰興兵者吉 郝

萌曰歲星犯守天軍為兵起有破軍死將

歲星犯北落十四

石氏曰歲星與北落相貫抵觸光芒相及有兵大戰破軍殺將伏屍流血不可當也期百八十日若一年又守北落亦為兵起

歲星犯土司空十五

海中占曰歲星守土司空其國以土起兵若有土功之事天下旱 郝萌曰歲星守土司空多土功事

歲星犯天倉十六

黃帝占曰歲星入天倉中主財寶出主憂亂臣在內天下有兵而倉庫之戶俱開主人勝客客事不成期二十日中而發 巫咸曰歲星入天倉若守之天下有轉粟之事歲惡民饑 齊伯占曰歲星守天倉諸侯有發粟之事兵起星若當戶守之將受命不為主用

歲星犯天困十七

石氏曰歲星入天困天下兵起困倉儲積之物皆發用

一曰御物多有出者庫藏空虛期二年

歲星犯天廩十八

石氏曰歲星犯守天廩天下亂大饑粟散出 甘氏曰
歲星入守天廩天下有兵歲大饑倉粟散出不出其年
歲星犯天苑十九

甘氏曰歲星入守天苑牛羊禽獸多疾疫若守之二十
日兵起馬多死其國憂

歲星犯參旗二十

海中占曰歲星守參旗兵大起弓弩用士將出行一曰
弓弩貴

歲星犯玉井二十一

黃帝占曰歲星入玉井為強國失地其出之強國得地
巫咸曰歲星入玉井國有水憂若以為水敗水物不
成期不出年

歲星犯天屏二十二

甘氏曰歲星入守天屏星諸侯有謀若大臣有戮死者

歲星犯天厠二十三

黃帝占曰歲星入守天厠為大臣有戮者 甄耀度曰

歲星入守天厠星天下大饑人相食死者大半期二年
歲星犯軍市二十四

石氏曰歲星入守軍市兵大起大將出若以饑兵起

歲星犯野鷄二十五

甘氏曰歲星入犯守野鷄其國凶必有死將軍營敗兵
士散走

歲星犯狼星二十六

郝萌曰歲星守犯狼星大人免 石氏曰歲星入守犯
狼星野獸死 荊州占曰歲星守犯狼星大將出行其
國有兵一曰有死將 玉厯曰歲星犯守狼星大將出
天下多兵盜賊起人主憂

歲星犯弧星二十七

荊州占曰歲星守弧貴人多死若將當貴人伐 荊州
占曰歲星守弧大將有千里之行國驚

歲星犯天稷二十八

海中占曰歲星犯守天稷有旱災五穀不登歲大饑一
曰五穀出

歲星犯甘氏外官二

歲星犯四輔一

荊州占曰歲星中犯乘守四輔星君臣失禮輔臣有誅
者

歲星犯日星二

荊州占曰歲星守日星王者得忠臣陰陽平守之二十日至四十日不去王者與天同心四夷和平五穀大豐

歲星犯天田三

荊氏占曰歲星守天田五穀豐不出年中

歲星犯平道四

甘氏曰歲星守平道天下治隱士外不出一年

歲星犯酒旗五

荊州占曰歲星守酒旗天下大酺有酒肉財物賜若爵

宗室

歲星犯天高六

黃帝占曰歲星逆行天高其君齋戒不謹一曰守天高
赦

歲星守天潢七

黃帝占曰歲星入天潢為天下大亂易政一曰貴人死
黃帝占曰歲星入天潢為運道不通兵起 郝萌曰

歲星失度入天潢中為人主以水為害若以井為害以

見入之日占其國及與其官 黃帝占曰歲星中犯乘
守天潢期二十日兵起

歲星犯咸池

甘氏曰歲星入咸池有兵喪天子且以火敗失忠臣若
旱一曰大水道不通貴人死以入日占國 郝萌曰歲
星入咸池為有以迷惑人主者一曰大旱歲饑 郝萌
曰歲星入咸池北大水出咸池南旱 荊州占曰歲星
入咸池天下大亂人君死易政以入日占其國

歲星犯天街九

郝萌曰歲星當天街為諸侯自立為王一曰大水 郝萌曰歲星留止逆行天街中為兵革起 石氏曰歲星犯守天街及徘徊亂行主弱臣強道隔絕天下不通 郝萌曰歲星不從天街為政令不行不出其年有兵

歲星犯甘氏外宮三

歲星犯哭泣一

甘氏曰歲星犯哭泣有大喪

案宋天文志曰孝武太元二年一年六月辛巳歲星犯

哭泣星占曰有哭泣事
是年九月孝武帝崩

歲星犯鉞鑽二

荊州占曰歲星犯天鉞鑽五以上臣有謀 又曰歲
星犯鉞鑽誅國相 郝萌曰歲星中犯乘守鉞鑽為鉞
鑽用一曰兵將有憂

歲星犯芻藁三

黃帝占曰歲星入天積中主財寶出憂臣在內

天積芻
藁也

歲星犯軍井四

荊州占曰歲星入軍井三日以上其歲大水

歲星犯天狗五

荊州占曰歲星入天狗北夷大饑來歸隣國多土功

歲星犯天廟六

黃帝占曰歲星入天廟若守皆為廟事一曰為凶憂
荊州占曰歲星入天廟有廟殘之事吏不去死

歲星犯巫咸外官四

歲星犯土司空一

荊州占曰歲星守入土司空有土徭之事

歲星犯鍵閉二


荊州占曰歲星犯守乘鍵閉星大臣有誤天子尊事天者天子不宜出宮下殿有匿兵於宗廟中者 荊州占曰歲星守鍵閉王者出國不出七十日

歲星犯天淵三

郝萌曰歲星守天淵海水出江河決溢若海魚出

歲星犯天廐五

荊州占曰歲星入天廐中十日以上馬有食變黃帝
占曰歲星守天廐為災之事人主以馬為憂不則馬死



唐開元占經卷二十九